

Evening Dogri (NSD) Bulletin 09-10-2023

आकाशवाणी

खबरां

- 1 चुनां कमीशन नै 5एं राज्यें च असैंबली चुनाएं दी घोषणा कीती ऐ।
- 2 प्रधानमंत्री नरेन्द्र मोदी होरें तंजानिया दी राष्ट्रपति सामिया सुलुहु हसन हुंदे कन्नै नमीं दिल्ली च दपक्खी ते डैलीगेशन स्तरै दी गल्लबात कीती।
- 3 रक्षामंत्री राजनाथ सिंह होर इटली ते फ्रांस दे चऊं दिनें दे दौरे पर जा'रदे न।
- 4 ईजराइल ते हमास बश्कार होआ'रदी जंग च मरने आलें दी गिनतरी 11 सौ थमां बद्ध होई गई ऐ।
- 5 प्रधानमंत्री नरेन्द्र मोदी होर एशियाई खेड्डें च हिस्सा लैने आले भारतीय खडारिएं दे दल कन्नै गल्लबात करगंन ते संबोधत करगंन।

<><><><><><>

ECI-Election Dates

मिजोरम, छत्तीसगढ़, मध्यप्रदेश, राजस्थान ते तेलंगाना च विधान सभा दे चुनां औंदे म्हीने दी 7 कोला लेइयै 30 तरीक दे दरमयान कराए जांगन, जिसलै जै वोटें दी गिनतरी त्रै दिसम्बर गी होग। भारतीय निर्वाचन आयोग नै इनें 5एं राज्यें च विधानसभा चुनाएं दे कार्यक्रम दी अज्ज घोषणा करी दित्ती ऐ। मिजोरम च 7 नवम्बर गी इक्कै गेड़ च मतदान कराया जाग ते एह्दे लेई अधिसूचना इस म्हीने दी 13 तरीक गी जारी कीती जाग। छत्तीसगढ़ च पैहले गेड़ तैहत 7 नवम्बर ते दूए गेड़ तैहत 17 नवम्बर गी वोट पोआए जांगन। पैहले गेड़ दे चुनां लेई अधिसूचना इस म्हीने दी 13 तरीक ते दूए गेड़ लेई 21 तरीक गी जारी कीती जाग। तोआई मध्यप्रदेश च 17 नवम्बर गी होने आले मतदान लेई अधिसूचना 21 अक्टूबर गी जारी कीती जाग। राजस्थान च वोट 23 नवम्बर गी पोआए जांगन ते

एहदे लेई अधिसूचना 30 अक्टूबर गी जारी कीती जाग। तोआई तेलंगाना च बी इक्कै गेड़ च 30 नवम्बर गी वोट पोआए जांगन जेहदे लेई अधिसूचना 3 नवम्बर गी जारी कीती जाग। नमीं दिल्ली च मीडिया गी इस बारे जानकारी दिंदे होई मुख् निर्वाचन आयुक्त राजीव कुमार होरें आक्खेआ जे इनें चुनाएं दा महत्व इस करियै मता महत्वपूर्ण ऐ की जे 2024 दे लोकसभा चुनाएं कोला पैहले होने आला एह खीरी चुनां ऐ। उनें दस्सेआ जे निर्वाचन आयोग चुनाएं गी पूरी चाल्ली साफ सुथरे, अजादाना ते पारदर्शी ढंगै नै ते कन्नै गड़बड़ी रैहत करोआना जकीनी बनाग।



ECI-JK

भारतीय चुनां आयोग नै अज्ज आक्खेआ ऐ जे जम्मू कश्मीर च चुनां सेही समें पर ते इत्थुआं दी सुरक्षा स्थिति गी ध्यानै च रखदे होई करोआए जांगन। मुख् चुनां आयुक्त राजीव कुमार होरें एह गल्ल 5 राज्यें च विधान सभा चुनां करोआने बारे कार्यक्रम जारी करने लेई आयोजित प्रेस कांफ्रेंस दरान आक्खी। जम्मू कश्मीर च चुनां उसलै करोआए जांगन जिसलै आयोग गी लग्गोग जे एह सेही समां ऐ। चुनां लेई सुरक्षा स्थिति ते होर दुई चीजें गी बी दिखेआ जाग।



BJP-Congress

भाजपा नै 5 राज्यें दे विधानसभा चुनाएं दी घोषणा दा सुआगत कीता ऐ। इक सोशल मीडिया पोस्ट च पार्टी अध्यक्ष जे.पी.नड्डा होरें आक्खेआ जे प्रधानमंत्री नरेन्द्र मोदी हुंदी अगुवाई च भाजपा सब्बनें राज्यें च बहुमत कन्नै सरकार बनाग ते अगले 5 बरें तगर लोकें दिएं आसें—तांगें गी पूरा करने दा कम्म करोग। कांग्रेस पार्टी नै बी भरोसा जताया जे ओह लोकें दे विश्वास ते समर्थन कन्नै इनें सब्बनें राज्यें च बहुमत कन्नै जित्त हासल करोग। पार्टी नै इक सोशल मीडियो

पोस्ट च आक्खेआ जे इनें राज्यें च उसदी जित्त करसानें,मजदूरें, युवाएं ते महिलाएं दे अधिकारें दी जित्त होग।



India Tanzania

प्रधानमंत्री नरेन्द्र मोदी ते तंजानिया दिएं राष्ट्रपति सामिया सुलुहू हसन हुंदे बश्कार अज्ज नमीं दिल्ली केई बक्ख-बक्ख मुद्दें पर दपक्खी गल्लबात होई। बैठका च दौनें नेताएं दपक्खी सरबंधै कन्नै जुड़े दे बक्ख-बक्ख पैहलुएं पर तफसीली सोच बचार ते समीक्षा कीती। कन्नै गै उनें दौनें मुल्खें बश्कार सरबंधें गी निग्गर बनाने ते उंदे एतिहासिक सरबंधें गी होर अगड़े लेई जाने दे तौर तरीकें दे बारे च बी गल्लबात कीती। दौनें पक्खें बश्कार शिष्टमंडल सतह दी गल्लबात होई जेहदे च बपार, रासपूंजी,रक्षा, समुंद्री सुरक्षा,विकास कम्में च भेयाली, उच्च शिक्षा ते लोकें लोकें बश्कार आपसी संपर्क सनें केई होर क्षेत्रें च सैहयोग बधाने बारे बी गल्लबात कीती गई। बैठक दे बाद इक सांझी प्रेस वार्ता गी संबोधत करदे होई प्रधानमंत्री मोदी होरें आक्खेआ जे भारत ते तंजानिया दी बड़ी परानी दोस्ती दे सफर दा अज्ज इक एतिहासिक ध्याड़ा ऐ जदूं साढ़े सरबंध होर अगड़े बधदे होई सामरिक सतह पर पुज्जी गे न। अफ्रीका च तंजानिया भारत दा सब्बने शा करीबी विकास भ्याल ऐ। मोदी होरें आक्खेआ जे बपार कारोबार ते निवेश दे क्षेत्र दे इलावा हून दवै मुल्ख मकामी करंसी च बपारिक लैन देन शुरू करने बारे इक समझौते पर कम्म करा करदे न। उनें दस्सेआ जे दौनें मुल्खें रक्षा क्षेत्र च सैहयोग लेई अपना 5एं बरे दा इक खाका तैआर कीता ऐ जेहदी मदद कन्नै होरने केई क्षेत्रें च साथ सैहयोग ते सांझ भेयाली बधोग। उनें इस गल्लै पर बी खुशी प्रगट कीती जे तंजानिया नै कुल संसारी सतह दे जैव इंधन गठबंधन, जेहड़ा जी-20 शिखर सम्मेलन दरान बनाया गेआ ऐ, ओहदे च शामिल होना मन्नी लैता ऐ। प्रधानमंत्री होरें इब्बी आक्खेआ जे दवै मुल्ख इस बचार पर बी सैहमत न ते आतंकवाद समूलची मनुक्खता लेई इक गंभीर खतरा ऐ जिसी दना बर्दाश्त नेई कीता जाना लोड़चदा।



Defence Minister

रक्षामंत्री राजनाथ सिंह होर इटली ते फ्रांस दे चरुं दिनें दे दौरे लेई रवाना होई गे न। अपने दौरे दे पैहले चरण च रक्षामंत्री हुंदा इटली दे रक्षामंत्री हुंदे कन्नै मलाटी दा प्रोग्राम ऐ। मार्च 2023 च इटली दे प्रधानमंत्री हुंदे भारत दौरे मगरा भारत ते इटली बश्कार सामरिक सांझ भ्याली गी होर बल थोआ हा। अपने दौरे दे दूए गेड़ च राजनाथ सिंह होर फ्रांस दे रक्षामंत्री हुंदे कन्नै पैरिस च 5मीं सलाना रक्षा गल्लबात च शामिल होंगन। भारत ते फ्रांस अपनी सामरिक सांझ-भ्याली दे 25 ब'रे मना'रदे न। दौनें मुख्यें बश्कार डूंहगे ते विस्तार आले दपक्खी रक्षा सरबंध न। रोम ते पैरिस दौनें थाहरें रक्षा मंत्री होर रक्षा उद्योग दे मुख्य कार्यकारी अधिकारिणं ते वरिष्ठ प्रतिनिधिणं कन्नै गल्लबात बी करगंन तां जे उद्योगी साथ-सैहयोग च होर मते मौके बारे चर्चा कीती जाई सकै।



Israel

इजराइल ते हमास बश्कार चला'रदी जंग च मरने आलें दी गिनतरी 11 सौ थमां उप्पर टप्पी गई ऐ जदके 1 लक्ख 23 जहार लोक गाजा पट्टी थमां बेघर होई गे न। अमरीका नै इजराइल दे समर्थन च जंगी जहाज ते लड़ाकू जहाज तैनात करी दित्ते न। एह जंग शनिवारें उस बेल्लै शुरू होई जेल्लै हमास नै इजराइल उप्पर केई राकेट छोड़े ते अपने लड़ाकुएं गी भेजेआ जिनें केई नागरिकें दी हत्या कीती ते केइएंगी बंधक बनाई लैता। इजराइल नै गाजा पर हवाई हमले करियै एहदा परता दित्ता ते जंग छिड़ी गई। इजराइल दी फौज नै आक्खेआ जे उन्नै 500 ठकानें गी नशाना बनाया ऐ ते घुसपैठ आली मती थाहरें पर वापस अपना नियंत्रण स्थापत करी लैता ऐ। अमरीका ते इजराइल दा जबरदस्त समर्थन कीता ऐ ते होरनें मुख्यें गी इस जंग थमां दूर रौहने दी चेतावनी दित्ती ऐ। अमरीका दे

राष्ट्रपति जो बाइडेन होरें अमरीका दे जंगी जहाजें ते लड़ाकू जहाजें गी इजराइल दे होर नेडे जाने दा हुकम दित्ता ऐ ते फौजी सहायता दी घोषणा कीती ऐ। संयुक्त राष्ट्र नै आक्खेआ ऐ जे इस जंग कारण 73 जहार लाकें स्कूलें च शरण लैती दी ऐ। एह तनाजा होरने इलाकें च बी फैली गेआ ऐ। इजराइल ते ईरान दे समर्थन आले हेजगुल्लाई गुट बश्कार बी गोलीबारी ते राकेट दागे जाना शुरू होई गेआ ऐ। मिस्र च दौं इजराइली नागरिकें दी गोली मारियै हत्या करी दित्ती गई। पछ्ची मुख्य इजराइल जदके मध्य-पूर्वी मुख्य हमास दा समर्थन करा'रदे न।



PM-Athlete Meet

प्रधानमंत्री नरेन्द्र मोदी होर कल नमीं दिल्ली च एशियाई खेड्डें च हिस्सा लैने आले भारतीय एथलीटें दे दल कन्नै गल्लबात करगंन ते उनेंगी संबोधत करगंन। इस कार्यक्रम च प्रधानमंत्री एशियाई खेड्डें च बेहतर उपलब्धि आस्तै एथलीटें दी सराहना करगंन। उनें गी भविक्ख दिएं प्रतियोगिताएं आस्तै प्रेरित करगंन। एशियाई खेड्डें च 28 सुन्ने सनें भारत नै कुल 107 तगमें हासल कीते न। एशियाई खेड्डें च एह भारत दा सब्बने थमां बेहतरीन प्रदर्शन ऐ। कार्यक्रम च एशियाई खेड्डें आस्तै भारतीय दल दे खडारी उंदे कोच, भारतीय ओलंपिक संघ दे अधिकारी ते राष्ट्रीय खेड्ड महासंघें दे प्रतिनिधि हिस्सा लैंगन।



Anurag Athletes

युवा मामलें ते खेड्ड मंत्री अनुराग सिंह ठाकुर होरें उनें सब्बने खडारिएं गी सलाम कीता ऐ जिनें अपने शानदार प्रदर्शन कन्नै भारत गी ऐतिहासक मान दोआया ऐ। इक सोशल मीडिया पोस्ट च श्री ठाकुर होरें आक्खेआ जे 60 ब'रें च पैहली बारी भारत नै एशियाई खेड्डें च 107 तगमें हासल कीते न। एह 2018

ब'रे दे तगमे थमां 52 फीसद मते न। उनें आक्खेआ जे खेड्डें लेई पूरा पराता सरिस्ता प्यार करने दे सरकार दे पक्कै धेइयै नै खडारिएं दी हर सतह पर मदद कीती ऐ जेह्दे राएं एह ऐतिहासक नतीजे हासल हाए न। ठाकुर होरें आक्खेआ जे जिस आत्म विश्वास कन्नै खडारिएं प्रतियोगिता च हिस्सा लैता ऐ ओह हर भारतीय लेई खुशी दा पल ऐ। उनें गलाया जे ओह कल सारे खडारिएं कन्नै मलाटी करगंन ते उंदे कन्नै जित्त दी खुशी गी सांझा करगंन।

<><><><><><>

Hardeep Energy

पेट्रोलियम मंत्री हरदीप सिंह पुरी होरें आक्खेआ ऐ जे इजराइल-फिलिस्तीन संघर्ष कन्ने भारत आस्तै ऊर्जा संकट पैदा नेई होग। अज्ज नमीं दिल्ली च 26मीं ऊर्जा तकनालोजी सरबंधी बैठक दा उदघाटन करदे होई होई श्री पुरी होरें आक्खेआ जे सरकार इस पर तक्क रक्खा'रदी ऐ। उनें गलाया जे मुख्य इस मामले दे मददेनजर अपना हल्ल कड्डी लैग। भारत ऊर्जा परिवर्तन आली भेठा बधा'रदा ऐ। भारत च ऊर्जा बदलाव पैहले जीवाश्म आधारित ईंधन थमां स्वच्छ ईंधन ते हुन नवीकरणीय ऊर्जा आली भेठा बधा'रदा ऐ। त्रै दिन दे कार्यक्रम दा विशे उभरदी ऊर्जा ते भविक्ख च इसी होर बेहतर बनाने सरबंधी तौर तरीके।

<><><><><><>

Ayush-AIIMS

केन्द्रीय आयूष मंत्री सर्वानंद सोनेवाल होरें आक्खेआ ऐ जे मुख्य च अखिल भारतीय आयुविज्ञान संस्थानें च आयूष आस्तै गै अकादमिक विभाग खोलेआ जाग। राष्ट्रीय आयूष मिशन दी मुंबई च क्षेत्रीय समीक्ष बैठक च उनें गलाया जे सरकार सेहत सेवा प्रणाली दी सब्बनें सतहें पर लोकें गी भलेया अज्जै कल्लै द तीते

रिवायती दौनें चाल्ली दी सेहत सुविधाएं गी जकीनीबनाने दा जतन करा'रदी ऐ।
उनें गलाया जे कोविड महामारी दरान आयूष सरिस्ते गी दुनिया भरै च पंछान
थ्होई ऐ। विश्व सेहत संगठन नै आयूष मंत्रालय कन्नै रलियै 2 रोजा सम्मेलन
गुजरात च आयोजित कीता।

<><><><><><><>

Ayushman Bhav

आयूष्माण भव: इक म्हीने दे अंदर-अंदर त्रै लक्ख यूनिट रक्त किट्ठा करता गेआ
ऐ। इस अभियान गी सेवा पखवाड़े दे दरान 17 सितम्बर गी शुरू कीता गेआ हा
ते एह 2 अक्तूबर गी समाप्त होआ। सेहत मंत्री मनसुख मांडविया होरें इक
सोशल मीडिया पोस्ट च आक्खेआ जे एहदे शा पैहले सलाना 9 लक्ख यूनिट गै
किट्ठे कीते जंदे हे। उनें मनुक्खता दी सेवा लेई रक्तदान करने आले सब्बनें
लोकें दा धन्नबाद कीता।

<><><><><><><>